



SALA STAMPA DELLA SANTA SEDE **BOLLETTINO**

HOLY SEE PRESS OFFICE BUREAU DE PRESSE DU SAINT-SIÈGE PRESSEAMT DES HEILIGEN STUHL
OFICINA DE PRENSA DE LA SANTA SEDE SALA DE IMPRENSA DA SANTA SÉ
BIURO PRASOWE STOLICY APOSTOLSKIEJ دار الصحافة التابعة للكرسي الرسولي

N. 0396

Sabato 14.08.2004

LETTERA DEL SANTO PADRE ALL'EM.MO CARD. JAVIER LOZANO BARRAGÁN, NELLA RICORRENZA DEL 25° ANNIVERSARIO DELL'ORDINAZIONE EPISCOPALE

LETTERA DEL SANTO PADRE ALL'EM.MO CARD. JAVIER LOZANO BARRAGÁN, NELLA RICORRENZA DEL 25° ANNIVERSARIO DELL'ORDINAZIONE EPISCOPALE

Pubblichiamo di seguito la Lettera che il Santo Padre Giovanni Paolo II ha inviato all'Em.mo Card. Javier Lozano Barragán, Presidente del Pontificio Consiglio per gli Operatori Sanitari (per la Pastorale della Salute), in occasione del 25° anniversario dell'ordinazione episcopale, che ricorre domani 15 agosto, Solennità dell'Assunzione della B. V. Maria:

• LETTERA DEL SANTO PADRE

Venerabili Fratri Nostro
XAVERIO S.R.E. CARDINALI LOZANO BARRAGÁN
Praesidi Pontificii Consilii pro Valetudinis Administris
sive pro Pastoralis Valetudinis Cura

Mariano omnino sub signo susceptum et adhuc completum episcopatum tuum, Venerabilis Frater Noster, plurimi quidem hoc tempore concelebrare festinant propter faustum ipsius argenteum iubilaeum, quod - ut omnes noverunt - in ipsam sollemnitatem Assumptionis B.M.V., Deo largiente, incidet. Etenim viginti quinque abhinc annos in veneranda Basilica Virginis Guadalupensis illo ipso die plenitudinem accepisti sacerdotii.

Cum omnibus ergo qui episcopalis tui operis curriculum tum inter gregem Mexicanum, tum apud communitatem dioecesanam Zacatecensem ac postremo hic in Apostolicae Sedis officiis observaverunt laudaveruntque Nos in primis vehementem Nostram coniungere cupimus gratulationem de honorifica hac vitae tuae meta ac de meritorum numero quae pro Dei populo passim tibi cumulavisti.

Tuam vero maximi aestimamus industriam pro iis hominibus quos Ecclesia peculiari semper amore ac sollicitudine persequitur, nempe infirmis aegrotisque quorum curam apud Pontificium Consilium pro Valetudinis Administris Nostra ex voluntate septem hos superiores annos adeo amanter geris atque efficienter pro Christo.

Sicut toties antehac benevolentiam erga te Nostram sumus testificati, hac data opportunitate eam manifesto

renovamus bonis cum omnibus de anniversaria tua memoria ac fervidis similiter precibus ut diu posthac servire Ecclesiae valeas tua ex maximi momenti statione et etiam episcopali administratione pro universis aegrotantibus, maxime in annua eorum die propria apud Marialia totius orbis sanctuaria.

Splendidum tibi tuisque procul anniversarium diem precamur, plurimum tibi ex hac celebritate ominamur spiritualis laetitiae, Divini Magistri remunerationem tibi optamus uberrimam pro universi episcopalis tui operis laudibus fructibusque. Interea his cum gratulantibus Nostris sensibus ac Litteris fraternis Benedictionem quoque Nostram largissime tibi transmittimus, aestimationis Nostrae testem simulque donorum posthac caelestium semper conciliatricem.

Ex Arce Gandulfi, die XXI mensis Iulii, anno MMIV, Pontificatus Nostri sexto et vicesimo.

IOANNES PAULUS II

[01282-07.01] [Testo originale: Latino]
